

寶應縣志卷十七

人物志目

隱逸

梁

臧榮緒

元

劉炎

明

朱璿

周安施琳

周朝

吉第

劉心學

孫中行

張璘

王巖朱宣

喬邁弟翊

張爾靜

湯廷頌

寶應縣志

卷十七目

人物志

鄭在涓

施光祖孫士勳

魯申

丁敦

甥仲以詵子

趙璉

黃學周杜士祿張龍光朱應麟陳景藩

藝術

清

盛宗楨

姚英煥

姚德徵

刁銳

王士光

苗嘉生

徐泉

朱芝芳陸日藻黃豫等

喬在馨

田灝

子德三問作人

朱慶珩

劉稼

李金生

涂寶懷

應從周

管瑚姚芹

馮漢章

祁斗南

子泱旬金聲

居鳳樓

弟筠

劉元瀚

林際雍

朱雲鸞

張振盞

蔣慶雲

朱某

流寓

明

陳文

問朝

梁以樟

兄以樟

王世德

子潔

李元鼎

王猷定

王錫命

清

高懋賢

李松復

張垓

史奕瓌

子紹登等

王蒼

王旭林

錢玉

子煒元等

孔繼鏢

孫應科

陳階平

孫蘭

鮑源深

子孝裕

王錫元

萬葉封

子來復

程璠

楊回子

王漢鼎

沈國翰

子麟照

李智永

陶大喬

孫之鼎

胡長源

等

尙維馨

閔欽明

楊順清

吳復和

子學純孫龍

徐歧

徐桂岑

汪嗣龍

徐樹萬

方外

唐

尼真如

清

僧八極

僧昌智

僧元徹

僧夢覺

僧行一

道韓崇誼

僧隱松

僧可樵

僧化純

僧戒空

寶應縣志卷十七

人物志

隱逸

臧榮緒東莞莒人教授京口隱居不仕自號被褐先生  
惟關康之與之游時稱京口二隱志辨

劉炎字漢卿世居邑之羨塘父思謙宋嘉熙中佐淮東  
漕幕調餉有能名炎蚤失怙恃刻礪獨立業益精咸淳  
末與鄉薦未陞而內附時淮甸創殘經賦殆絕行省聞  
炎材略以委吏辟炎笑曰苟可以有為雖抱關擊柝可  
也民不加徵而輸有餘官不加督而貢勿後以公功議

寶應縣志 卷十七 隱逸 三 人物志

遷不復肯仕躬耕教子周急恤孤耆年碩德者禮之如  
弗及趨末自棄者諄諄然誨之惟恐其不化所居廓有  
餘地戚黨或借而廬焉歲久不復彊遂予不問里之人  
薰而善良皆親之敬之曰此吾羨塘翁也晚歲構別業  
軒花庭竹悠然自娛扁齋曰留吟與董愛梅俞容齋二一人

名失論文賦詩圖經

朱瓘字楚琦兒時遇高御史昭誦書不輟昭戲之曰雞  
聲難比鳳瓘應曰魚化卽成龍昭奇愛之因受業焉初  
試棘闈不利輒棄舉子業與邑人周安施琳偕隱博覽  
羣書尤通尚書周禮工詩體韻適逸聲振藝林景泰時

有詔舉賢良邑令朱瑗白巡撫都御史王竑薦瓊瓊辭  
茲遣以粟帛會修天順實錄其事之在郡縣者詔守令  
編葺上之館閣有司持幣走其廬瓊辭有司強之出爲  
定凡例謹書法一時紀載皆出其手與修淮揚志贈遺  
俱不受既歸畜雙鶴自隨顏其亭曰馴鶴日鼓琴其中  
鄉人稱琴鶴先生入市以大笠覆首又稱圓笠先生大  
學士費宏嘗曰此戴安道張天驥之儔也所著有馴鶴  
亭集安字邦泰結廬東谿邑人稱曰東谿先生性澹素  
閒適爲詩千首皆道東谿隱逸之樂瓊卒託孤於安安  
教育如己子琳字汝琛稱林塘逸叟亦工詩

道光志

周朝字光卿少時有聲鬻舍嘉靖九年歲貢生絕意仕  
進閉門掃軌以文酒自娛足不涉街市者數十年縣大  
夫屢賓禮之不出學博支澤贈朝詩有白首不聞臨飲  
射紅塵那得上衣裘之句

道光志

吉第字天卿萬歷三十八年歲貢歷仕至臨清關主事  
罷歸家居華門環堵蕭然貧也足跡不至街衢人士多  
不識其面

圖經

劉心學字近思號兼山永澄子生數歲而永澄卒賴母  
韓教育性至孝嘗以祖父疾輟省試親奉藥餌不解衣  
帶者累旬事母終身孺慕永澄既歿東林諸君子猶數

數過其家心學守家學弗替築堂城東隅延致講學其中高忠憲顏其堂曰興讓且爲碑記椽人構忠憲死邑有借心學求媚者錄其文獻之鄉黨咸懼株及心學慨然曰吾以此獲罪可以見先君子於地下且吾得從高丈游尙何恨事幸得寢甲申後以明廩生須次當貢太學棄去不顧益肆力於心性之學先儒劉宗周曰近思以垂髫繼父業予與闡聖賢性理之旨了悟無疑喜練江有後未墜也心學性嗜善戚友問多受惠者永澄創烈女祠心學新之興喬可聘王有容倡同善會福鄉人所著四朝大政錄多足羽翼正史晚年與同志結社惟

談經典不及時事然或豪飲自放當其酒酣耳熱瞪目慨慷騷愁昇兀襞績千秋座中客無不欬歎嘆息者年七十餘卒同治四年以孝子旌予以化以任孫中柱中行中從曾孫家珍並有名以化等俱別有傳中行號伴梅少慕元秘遂棄青衿學衛生術查士標爲題所居曰

養拙軒習靜終老

道光志

張璣字韞仲永明知縣曉孫崇明壬午舉人自癸未下第後不復赴公車時順天進士梁以樟卜居寶應璣相與友善以理學節義相切劘幅巾野服有古逸民之風最後有仇璣者攻璣璣不得已會試至京師同試者以

爲疑璣出憶梅詩相示有廿年留得冰心在一任寒風  
徹夜吹之句果以墨塗卷而歸終身不仕是時邑中之  
號逸民者諸生中曰王巖曰劉心學曰喬邁曰朱四輔  
未爲諸生者曰朱宣巖字築夫原名天佑字平格言綽  
子少有經濟才嘗作私議數萬言又作道統職官水利  
錢幣漕運選舉治河荒政鹽法刑法弭盜屯田國用馬  
政志略十數萬言國變後棄諸生更名絕意仕進崑肆  
力古文辭其文考據經典模八家矩矱執經問字者踵  
相接若李推官念慈汪主事懋麟皆學文於巖巖爲人  
端嚴動止語默中程度事母以孝聞凡祀其先人致齋

三日獨處於外居喪哀毀幾殉兩弟皆不治生妹夫以  
官累皆待巖舉火冢婦之兄逃難走京師以母妻託巖  
拮据贍其家巖家江都知世將亂挈家歸寶應久之移  
寓興化寶應知縣葉燮築室迎巖不就暮年還揚州屏  
絕文詞專於求道守主靜良知之功邁字子卓可聘子  
絕意仕進治池館柘溪博覽羣書於典故多所辨證尤  
工五言詩大學生吳牲賦詩褒美比於范粲子孫宣字  
元膺原名克宣以從兄克簡貴易今名父爾弼迫之就  
試碎研遞去宣孤癖嫉俗罕與人交惟傾慕璣以詩文  
相質證璣亦深推許之酒酣則仰天長號人莫知其故

也梁以樟曰甚媿此一小書生璣所著木侍樓集邁歲寒堂集宣運甕集並藏於家巖遺稿已梓者異香集白田布衣集劉心學朱四輔自有傳又璣弟翊字羽季諸

生能詩道光志文苑事略

張爾靜字如山少讀書穎異有膽識入邑庠棄去崇禎初走京師應邊地開懇詔大部為疏請給以牛種在邊十年墾荒成熟果有殊功歷仕武英殿中書舍人尋乞假歸躬耕課子栖隱終身張璣為像贊有軼世之骨句蓋引為同調云子四惇愷悃皆邑諸生攜舉順治乙丑

進士道光志志辨

湯廷頌字欽哉邑諸生未老棄去放浪泉石間脩然自遠慕林和靖為人因自號梅逋藝梅數十本雜以桐桂松杉畜一鶴馴甚凡讀書飲酒對賓客入市井皆與鶴俱時梁以樟棲遯白田搜幽人野老為伴侶廷頌其一

焉道光志

鄭在湄字九起自號蒼頑子工詩善畫著述甚富閉影兼葭蒼茫中以葭名其園梁鷓林以樟贈詩褒美比於古不臣不友之士將卒自題其棺曰噫大塊遺民蒼頑鄭子之樞其為人澹蕩多類此在湄之外有施處士光祖字昌之梁處士如聳字叔鸞兩人者孤澹自喜棲短

垣敗屋草樹茂密布袍禿袖過市上顛髮半覆行歌烏  
鳥市人不識也又有孫世勳者字東山亦食貧有高致

道光志

魯申字維嶽崇禎癸未歲貢生幼穎異治濂洛學有心  
得國變後絕意進取友人促其赴試申峻拒之隱於邑  
里之白馬鄉不與世通著有白馬詩草讀書心得

丁敦字澹園隱東村不求聞達肆力於詩以自娛敦甥  
仲以懿以懿子立皆隱於詩以懿臨淄道中云遙望烟  
深處桃源別有津世以何無忌方之

文苑事略

趙璉字燕村諸生隱居湖西日以吟咏爲樂同時有黃

學周字月航杜士祿字霽村張龍光字仍卦朱應麟字  
了愚皆工詩隱於湖濱後有陳景藩字翰宗號少樓湖  
西有褚廟岡與大小雲山壤相接相傳爲鄧艾屯田處  
景藩隱居於此嘗吟雪三十首中有云渾淪一氣無私  
覆自是天心妙化工時以爲有胞與之量

文苑事略

### 藝術

盛宗禎字心國其先高郵人世工醫術後遷寶應之黎  
城因家焉宗禎精於醫幼科尤神異視兒耳紋辨黃紫  
曲直驗痘之遲速輕重可治不可治百不失一嘗過某  
家有兒戲階下語其媼曰可數與嬉戲豐食飲但三月



活耳後果如其言又某氏兒患痘最輕自謂可勿藥宗  
禎曰勿藥十二日死矣不聽果驗道光志

姚英煥字伯章工醫術爲人謙和不論貴賤貧富皆竭力調治以故城市村落遠近之人就而治症者戶外踵相接也道光志

姚德徵字充符工醫術子懼業儒嘗夢學使案發名第  
四曰姚懼因易名懼是年果充附學生名次亦合後邑  
罹水患家貧以醫術游京師御史謝兆昌患寒症汗後  
發斑諸醫投犀角黃連久之絕食飲懼進理中湯數劑  
而愈以此名重京師諸貴人爭延致之德徵妻顏賢淑

德徵與邑人丁翁善丁無子家貧不能置妾顏出白金  
二十兩勸德徵代置妾丁之妻感泣因不妬後生子四  
邑人傳爲美譚道光志

刁銳字雲江善畫山水人物畫菊兔尤工受學於陶雲  
湖李開先畫品云陶成畫原於趙千里僧巨然巨細皆  
妙然成性高古雖甚相好者得其畫不十一亦不輕傳  
授惟銳性頗相似遂盡得其傳嘉靖時嘗繪鳳陽祖陵  
圖世宗見之甚悅欲授以官辭不就朱秋厓云邑中先  
輩如鄭如淵之菊竹鄭竹軒名正中之花鳥號爲知名較  
之雲江翁則瞠乎後矣道光志

王士光字用晦苗嘉生字秀實皆曠達工書法嘉生尤  
適古知縣李楷賦老筆行贈之

道光志

徐泉宗道子善績荔又有朱芝芳績草蟲尤肖南宋人  
陸日藻世居柘溪工畫刻畫精細爲興化顧瑟如入室  
弟子時黃豫黃觀兄弟皆善山水兼工寫生鄭乾清工  
畫石劉閣學子傳馨以貴介怡情翰墨師淨垢老人日  
藻廁身其間亦足與舉旗對壘

道光志

喬在馨字牧山布衣善繪事家貧嗜飲每以畫易酒愈  
醉則畫愈工嘗自繪小影坐空樹中飲酒其豪邁不羈  
率類此性僻介顯者乞畫或餽以錢不顧而去飲以酒

寶應縣志

卷十七

藝術

十

人物志

則受之遇貧乏者則爲作畫使市錢貫米以歸

文苑事略

田灝字若梁一字小巖工工筆花鳥畫以適性爲主間  
作小品尤饒逸趣識者珍之性耽風雅暇輒撫琴咏詩  
脩然與塵世相絕子德三字炳濤幼業儒患瘰癧甚苦  
七年始瘳因棄儒習醫專以拯人疾苦爲志不計診金  
貧者且助以藥餌人多德之後有問作人字菊生精畫  
蟹亦工書

朱慶珩字錫汝幼嗜書畫長而益工書法董趙雖蠅頭  
小楷亦不失神髓畫以山水見長年逾七十筆力猶蒼  
秀可愛

劉稼號硯農精篆文尤工鐵筆嘗鐫刻安宜十二景蒼老入古章式撫鐘鼎篆文則各體俱備

李金生字礪衫號品南諸生幼穎悟能文章工山水人物尤善八分書石刻亟爲孔繼鑠所稱年未三十卒著有畫學宗傳

涂寶懷精眼科凡患目爲俗醫所束手者寶懷治之多瘵有漁者王某攜瞽女求治涂醫之兩月而瘥王餽不受後寶懷厄於險得其女救之乃免

應從周字紹文瓜山莊人精醫術尤長於痘科患痘者從周一見決生死嘗見一浣衣女從周命其徒往樓之

女慙忿欲死里人責其非禮從周曰此女額邊有紫紋係悶心痘也藥力不足以攻之不令急躁痘不得出必至悶死今無慮矣三日內必見言果驗又管瑚字夏卿得從周之傳郡守有子患痘劇使瑚治之瑚命宰猪去頭腹臟腑臥痘兒於內兒啼啓視之得蟲升許服藥而愈問其故瑚曰此名蟲痘見腥乃出非服藥可效也酬以金不受初瑚爲鄰案累株連至郡由是得脫瑚卒傳其術者有姚芹芹又傳於其子春潭孫貢南皆以善醫名世云

馮漢章字文煥世居白水莊聰穎好讀書尤精醫學歲

飢漢章自爲救飢丸散之活人無算鄉鄰就醫者輒效不受酬嘗至新集鎮有阮氏婦死一晝夜馮撫尸曰此婦未死擬方速服必愈觀者笑之藥入數小時果蘇人以爲葉天士復生云

祁斗南字畫莊邑諸生工詩善畫好施與喜靜坐道貌岸然與之接藹如也尤喜以修身立品勗後學年八十二卒子浹旬字旭亭亦工詩畫金聲字振亭工篆刻亦能詩浹旬金聲皆諸生

居鳳樓字小村精鍼灸之術性耽吟詠輯有紅蘭山館唱和詩稿弟筠字竹君邑諸生工書畫尤精眼科時有

### 醫中元季之目

劉元瀚字旣明精於醫每起他人所束手者逆藥之效不圭黍爽爲人寬厚和易醫不計值病劇延診者雖嚴寒酷暑深夜間卽徒步往人多德之著有醫玄漫錄又有林際雍者亦能醫

朱雲鷗字獻西號羨義增廣生少聰穎郡守沈錫晉奇其才拔置冠軍善書精鐵筆尤工花卉惜早卒未竟其學

張振峯原名醴泉字小山光緒庚寅恩貢安徽蕪湖婺源黟縣長知縣廉潔自持判審明決尤精醫著有痧

喉正義育嬰提要按摩要術等書

蔣慶雲字麗卿精於醫診病道原始及病之所屆如神  
又有朱姓字育民精於幼科有活痘神之稱

### 流寓

陳文合肥人元季明太祖起兵濠梁文挈家歸太祖南  
北征伐大小數百戰每戰輒奮勇突出與參政蔡遷同  
以驍勇名積官都督僉事性至孝父早喪奉母終身孺  
慕所至見稱流寓寶應以疾卒太祖聞之悼惜追封東  
海侯諡孝勇賜祭葬邑北郭向東衢曰諭祭街以侯名  
也明三百年文武臣得諡孝者惟侯一人後其裔孫守

墓寶應遂入邑籍以耕讀世其家

志辨

問朝字朝元先世溫姓原籍太原元末偕兄某仕蘇會  
張士誠亂兄死難隱邑之槐樓號槐野農家易姓名取  
閉門不言不忘故主之義終其身不涉城市日力田自  
食其力

梁以樟字公狄直隸清苑人崇禎己卯鄉試第一庚辰  
進士授太康知縣調商丘知縣京師陷以樟走江淮間  
閣部史可法延致幕下可法死以樟隱寶應時以樟年  
纔三十七才名傾海內姊夫王鐸父子官津要頻致書  
勸駕不應買田數十畝棲遁烟水之鄉署軒曰忍冬名

所居莊曰兔避由壯及老以死嘗自比宋謝臯羽鄭所南洵無媿也與張璠孫爾靜講習問學四方之士若沛閻爾梅南昌王猷定及崔干城僧松隱頻過以樟及劉純學家劇飲慷慨激昂繼以涕泣晚年偕喬出塵陳鈺朱克生劉中柱迨王世德父子結文字飲觴政皆抉剔經史旁及稗官野乘可記而傳也著詩文理學諸書以樟兄以柎字仲木亦終於寶應

道光志圖經

王世德字克承宛平人明襲錦衣衛指揮鼎革後攜二子潔源南奔就梁以樟偕隱築霜泉書屋於畫川西以居嘗憤野史誣罔作崇禎遺錄一卷康熙十八年詔修

寶應縣志 卷十七 流寓 十四 人物志

明史有司錄其副上史館潔字汲公源字崑繩皆博學善屬文源豪邁年四十餘舉京兆試始奉親櫬還里潔前卒源年五十後棄妻子為汗漫游踰六十客死山陽

道光志

李元鼎字梅公江西吉水人明季官兵部侍郎甲申後僑寓寶應築葦菴於東門外居之自稱白田寓公邑有大徭役疾苦數白於諸長吏以甦邑困人多德之子振裕受業張孝廉寅之門成進士後奉父歸官至戶部尚書罷官後仍往來不絕

道光志

王猷定字于一江西南昌人選貢窮愁著書力追大雅

海內翕然稱之崇禎末浮家至寶應數載遷高郵後卒

於浙中道光志

王錫命字蒼敕一字禹圖儀徵貢生遭亂隱居寶應之蘆村刻厲堅苦督子力耕與大興劉文炤長水吳鉏及干城以樟等相友善或放舟湖中相持慟哭見者駭愕不知所謂親戚罹難無歸者分宅授餐數十年如一日

卒後返葬儀徵江南通志儀徵志

高懋賢字聖期儀徵人家貧三旬九食忍饑講易無憂悴之色生平不趨榮利不妄交游唯與弟懋功閉門著

書隱居邑之蘆村後以水患歸故鄉卒年九十一道光志

寶應縣志

卷十七 流寓

十五 人物志

李松復字其見大興人家世勳裔兄松泰令寶應罷官

去松復獨留遂家焉為人伉爽負材略尚氣節士大夫

咸願與交年七十餘卒葬金牛墩道光志

張垓字鶴巢江都諸生父快園以明經為閩南永福令

既卒家中落垓安貧嗜學奔走衣食者三十年僑居寶

應久之移高郵道光志

史奕瓌字幼奇溧陽相國貽直子由三禮館議叙授衛

輝府通判擢潞安府知府丁父憂服闋補大同府知府

陞河東兵備道署臬篆卒奕瓌才堪四應長官以為能

娶寶應劉閣學師恕女因家焉子紹登字倬雲少喜讀

書而膂力絕人仕雲南文山知縣多善政苗賊作亂以獲賊功陞雲州知州署維西通判生擒逆首恆乍綱賞戴花翎越年餘卒紹登弟續登遂移籍寶應道光志王蒼字浩旃順天大興人官寶應縣丞解組後遂家焉蒼雖貧郎然性耽風雅工詩楷法鍾王草書尤蒼勁得者咸珍藏之居官亦清廉年近八十卒時又有王旭林字蓉初浙江錢塘人由諸生官寶應主簿與邑朱氏有連罷官遂依朱氏居焉工詩善楷法著有竹窗遺籙集

道光志

錢玉六合人世隸快籍乾隆二十年遷居邑之汜水鎮

寶應縣志

卷十七

流寓

十六

人物志

善治生家道寢昌子煒元掄元聯元皆有才能煒元字文光候選布政司經歷性好施予嘗以田七百餘畝施家祠作義產聯元由衛千總薦升至湖南寶慶副將居官勤幹以病乞歸卒道光志

孔繼鏢字宥函曲阜人至聖六十九世孫祖毓焯字如霆乾隆辛卯順天副榜孝行醇摯同治十三年旌表孝子父傳坤官寶應主簿流寓於邑繼鏢道光丙戌進士

清河吳崑田撰傳作丙申

授刑部主事改官南河同知棄歸寇陷廣陵佐雷以誠軍泰州以功擢知府尋丁內艱服闋德興阿駐江浦再起寇來犯繼鏢不屈死贈太僕寺卿繼鏢性



至孝父故方嚴繼鑠率妻妾子女事之能順其志尤篤於族致於室者幾數百指教養一如所親家坐是益落或無以應有不察者反以訾繼鑠自若也性尤磊落不事家人生產中年爲一姻婭毀其貲盡至貨居宅償負少負盛名交游徧海內師友率賢豪長者晚居邑與喬守敬成蓉鏡友益密尤喜汲引後進有一藝之善輒稱道且折行輩交之時以比李元禮陳仲弓云其學自經史至三乘九籥之書悉得奧窔詩宗漢魏五言凌越凡近尤善書似李北海寸縑尺素得者寶若圭璧爲文渾厚奧衍遠挹西漢爲詩名揜世罕知者著有心嚮齋集

子廣牧始入邑籍別有傳從子廣楫詩有清才繼鑠撫

如己出欲傳其學携至軍病歸歿年甫逾冠

文苑事略

孫應科字彥之號硯芝高郵歲貢生天性孝謹母歿嘗繪陟屺圖以誌哀寓邑汜水鎮道光辛卯遷入城宅後治圃得明知縣岳東升浚得寶河記碑因重建八寶亭嵌碑於壁李周南夏崑林撰詩詞紀其事應科長於考

證詩才尤清妙

文苑事略

陳階平原名安魁字雨峯號鹿岑安徽泗州人初事舉業工書能文改就行伍官至福建水師提督所至有勛績道光己亥夷犯順階平駐廈門火攻頗多當道梗其

議引疾退居寶應復起督辦浙閩軍務事平復歸有造藥程式疏浙撫劉韵珂以聞得旨各省著爲今年七十九卒上聞專使漕督致祭恤如例著有戎政芻言教練輯要梅花疊戰陣法職思集孫蘭字海長晚號海藏別號紉秋館主兩淮鹽大使工書畫見稱於時爲人曠逸不羈顯者求畫恆不應興到一揮常十數幅設邑鮮艷傳神微妙識者謂蘭之花鳥能近接張熊十三峯云

鮑源深字華潭號穆堂安徽和州人道光丁未進士改翰林授編修累官至山西巡撫予告始徙寶應源深簡重沈靜篤於孝友居官勇於言事多關國家根本至計

咸豐初有振乾綱儆積玩因人心諸奏四爲學政四入上書房行走授世子讀邀上方珍賜不可勝紀督學貴州時遵義團首王安國隱與賊聯積衆數萬謀變源深試士至密飭郡守檄令便道入擒斬之麻哈州陷苗教合作亂源深飛書丁文誠寶楨乞援復搜囊助餉戰捷賊散在黔思恩團首林如海欲假考試斂費以兵迎按臨意實迫挾源深迂道賀縣言狀率置如法在蘇崇實學開書局以饋寒士撫晉於吏治軍政鈇斧析微克勤克慎出行邊兵躬履險塞或徒步往見者嘆爲宿將不逮予告後主講金陵上海書院布衣麤食無殊寒畯生

平惻隱民物憂國愛人之念至老彌篤卒葬邑南鄉著有補竹軒集子孝裕字仲餘諸生兵部主事改官兩淮運判竺性孝友親歿哀毀盡禮時兄孝光官知府權釐江西以事羈不能歸孝裕哀金償之兄歿歸其喪撫諸孤成立築室父墓側讀書其中遂不復出孝裕才識通敏詩文一本性靈於聲律之學尤窮奧妙泰西學術亦能講明切究之嘗倡捐建學校以惠旅邑鄉人年六十三卒

王錫元字蘭生安徽盱眙縣人同治乙丑進士改官南河裏河同知治水利有亮績海知府性鯁直會與上官

忤棄歸徒邑築隅園城東優游終老錫元博學瞻聞終日手不釋卷撰盱眙志稿都三十萬言手自刊行精稿爲世所重藏書極富多秘籍年八十八卒所著有蟻廬詩抄夢影詞隅園隱語徐騎省集校勘記劉孟塗集拾遺未刊行者清駢體正宗箋水經註雋已佚

萬葉封字耐誠號筱亭安徽鳳陽人舉人歷官睢甯贛榆長洲等縣終太倉州知州所至杜絕苞苴愛民下士在沐盡力溝洫沐民賴之名所治河曰萬公河子來復字仲循廩貢生宿松縣教諭清廉愛士誠樸不欺工文善書卒於官

程璠字卓庵安徽婺源人工畫山水花鳥人物用筆意趣深遠題句尤饒丰韻喜藏古錢自繪錢譜四冊識者珍之平生善養氣靜坐寡言年越七十精神煥發如童年云

楊回子佚其名揚州人居邑授徒其親墓在邑北門外離明宮側楊無間寒暑朝暮必詣終其身如一日

王漢鼎高郵州人寓居邑泥甸莊家貧事父母至孝父患中風漢鼎衣不解帶者兩載餘刲股和藥進父驟瘥越二年父又病漢鼎又嘗糞母更多疾漢鼎晝夜奉侍罔懈後親歿喪葬盡禮事死如生終身不倦

沈國翰字筠生安徽泗州人歷任鹽城阜甯上元諸縣海州牧沈文肅以才識鎮定讞獄明決疏於朝母卒絕意仕進寓於邑遂家焉築晦廬東郊明韜養之志性好施嘗輸巨金立學校雅嗜書晨批夕校丹黃幾遍著補青館詩集史論隨筆卒年七十六子麟照號竹崖附貢生幼有至性事親下氣怡色能承其志母卒哀毀骨立父病嗽麟照奉養備至衣不解帶者凡數十夜卒年三十有八

李智永丹徒縣人早孤事母以孝聞母病篤智永刲股和藥進母病瘳享耄年妻鄒生子卒時智永年二十三

誓不再娶人稱其孝義

陶大喬丹徒人廬邑南鄉蘆村性孝友行醫貿易與人無忤年二十二妻歿遺一子終身不復娶年八十始卒孫之鼎性尤篤摯父卒祖年近七旬之鼎朝夕侍側寢則溫衾食則嘗味十餘年寒暑無間祖卒涕泣至目流血喪葬盡禮光緒二十九年以孝旌

胡長源高郵人山東甯陽知縣有政聲事嗣母袁以孝聞弟澤民字子惠官湖北襄陽衛遷德安歲飢傾囊助振旋轉荊州正尉從弟泉字杖仙附貢生辟孝廉方正邳州學正敦孝友好詩書里人稱白水先生著有音註

大學古本彙參王陽明弟子記註金蘭詩集泉弟冠英字小康湖北德安衛守備以廉稱泉兄子雨村雨田並附貢生雨村刑部員外郎雨田清河縣訓導授戶部員外郎與張太史船山輩以詩酒過從雨田子汝霖官山東永利場鹽大使又胡椅字友桐性逸慈創施材局立利孤所并施田爲義冢云

尙維馨江甯句容附生兵燹遷居寶應工書好學顏其軒曰養心軒卒年八十二

閔欽明字文甫高郵人性篤摯勇於爲善同治六年捻首南竄過寶應欽明與徐品三汪桂卿鄭蘭芳等率團

練出城防禦賊至追擊之幾中賊槍事定論功欽明謝之

楊順清字居溪鎮江人崇尚禮義喜施與不欲人知嘗曰吾行吾心之所安而已非沽名求報也卒年八十四吳復初號竹亭字遂遠儀徵人隱於醫咸豐癸丑與長子學純避兵來居遂家焉復初性真摯工詩亂後追溯既往如醉者墜車因名其集爲醉墜車吟學純字愛山敦厚長者爲人謀必忠其事孫龍孫號竺菴附貢生耽風雅不慕榮利選湖南寶慶府經歷不赴築園城東南隅顏曰祝廬未卒工龍孫竟歿

徐歧字會汾安徽定遠縣人咸豐四年來徙同治六年捻由清江竄至邑歧持矛偕鄉人迎擊自夜達旦所殺過當卒以衆寡殊首被重創扑北攬軍樓坂下浮水死捻亦驚走予卹世襲雲騎尉又徐桂岑字蘭坡山陽縣人咸豐間曾以千總剿匪有功淡仕進隱於邑性篤孝嘗刲臂療親樂善好施每歲秋清淮之就食江南者過邑桂岑輒伺河干以振饑者

汪嗣龍字雲生安徽定遠縣諸生成豐初亂作避難徒邑誠樸好善老益篤與成蓉鏡劉元浩等講學論道無虛日創湖西義渡尤德於人後五世同堂年八十有六

無疾端坐逝

徐樹萬字仲青甘泉諸生祖寅亮嘉慶四年會魁山東道御史父玉豐翰林遷詹事府右春坊右贊善兼日講起居注官樹萬稟承家學善屬文應童子試縣府院俱冠其曹淡於榮利不求進取居邑以詩自適著有五芝書屋吟稿

方外

尼真如鞏縣李氏女嫁賀若氏既寡爲尼其行高潔天寶末來居楚州安宜縣初在鞏時得五寶至是又得八寶言天帝所予命刺史崔旉進於天子攝令王滔之以

狀聞旉乃遣盧恆隨真如上獻肅宗卽日改爲寶應元年陞楚州爲上州縣爲望縣改安宜爲寶應號真如爲寶和寵錫有加真如所居之地得寶處河壩高敞境物潤茂後爲六合縣尉崔瑄所居兩堂之間西域賈人過嘗望而瞻禮焉

道光志

僧八極江都人汪比部懋麟之兄初婚時夢牀積繡枕八雙未幾妻死極懽然曰豈此生鼓盆無已時耶遂祝髮爲僧始住運河西準提庵修髯善飲工吟咏朱秋崖贈詩有橋橫無葉樹門立有髯僧之句後移北門外淨土庵至今庵有遺像一時名流題贈幾滿

道光志

僧昌智字度愚自廬山卓錫寶邑戒律精嚴皈依者衆時東門外蓮池庵爲懶雲和尚所創未就而懶雲卒邑人乃延昌智繼之昌智拓基址新殿宇安單接衆遂成巨刹而六時焚修數十年精進不懈後遂圓寂於此

道光

志

僧元徹字石吼浙江山陰人住寶應南門外松圓蘭若興化陸西星先生取浮屠不三宿桑下義改題曰一宿庵元徹住錫時適諸暨令朱公辰罷官歸交最契雍正戊申僧雪鴻諷大吏延主天童法席非其志也旋示寂

能詩刊有未篩集二卷語錄入大藏

道光志

寶應縣志

卷十七

方外

一四

人物志

僧夢覺字圓方行一字葦如又道士韓宗誼字正其皆

能詩與朱賽郭束潘遇莘王箴翼等爲詩友

文苑事略

僧隱松本姓孫鹽城人中年隱於釋爲邑華真君祠僧仍奉母祠中先意承志母喜魚每食越鄰俎庖魚手去丙乙以進穢器躬自洗滌七旬外猶嬉戲母側無倦容母享年九十有八隱松八十九歲卒

僧可樵號渾然子主一宿庵善畫蘭竹揮灑淋漓年老目不能辨而繪事不輟縱橫錯雜無一筆逾繩矩題句尤多妙諦卒年八十餘又有化純者觀音寺僧能書善詩亦年逾八十而終



僧戒空主學田茶菴有戒行終日瞑目禪坐逾午不食  
邑中劉廉訪鍾琳常引爲世外交云

